

四庫全書

子部

欽定四庫全書

子部  
冊府元龜卷一百二十四

詳校官中書臣涂日煥

員外郎臣牛稔文覆勘

總校官庶吉士臣何思鈞

校對官中書臣王 瓚

膳錄監生臣唐 滄

欽定四庫全書

冊府元龜卷一百三十二

宋 王欽若等 撰

帝王部

征討第二

唐高祖初為唐王隋義寧二年四月金城賊帥薛舉僭  
稱尊號乃下令曰大業喪亂兵革殷繁天下黔黎手足  
無措孤所以救焚拯溺乎此亂階蜀道諸郡深思蘇息  
遠勤王略誠有可嘉方一戎衣靜茲多難而薛舉狂僭

吞噬西土隴蜀通途恐相侵暴今便命將授律分道進  
兵其衝要諸郡縣宜率勵各募部民隨機底定斯則暫  
勞永逸貽厥子孫自國刑家同享安樂

武德元年六月以秦王為西討元帥征薛舉八月薛舉  
死賊黨推其子仁杲僭尊號復以秦王為西討行軍元

帥擊仁杲於涇州

十一月  
平之

九月遣工部尚書獨孤懷恩攻堯君素於河東

十二月  
平之

十月岐州賊帥郃江海自號新平王遣隴州刺史叔孫

老擊之江海率其衆來降是月南陽賊帥朱粲侵浙州

遣太常卿鄭元璠率步騎一萬擊之

二年四月  
粲奔世充

三年五月王世充侵濟州遣右驍衛大將軍劉弘基拔  
之

六月劉武周陷介州遣左武衛大將軍姜寶誼擊之

十月夏縣人呂崇茂殺縣令舉兵反自稱魏王以應劉

武周遣永王孝基工部尚書獨孤懷恩陝州總管于筠

內史侍郎唐儉等擊之

三年四月武周奔于  
突厥五月崇茂平

三年七月詔曰取亂侮亡聖主於是致治民和衆泰湯武所以成功兵革之興義資靖難出軍命將蓋非獲已自隋氏數窮天下鼎沸豺狼交爭黔庶凋殘朕受命君臨志存寧濟率土之內咸思覆育聲教所覃莫不清晏維彼伊維尚隔朝風世充作梗肆行凶暴害虐良善擁迫吏民反道亂常日月滋甚禍盈疊積天亡有徵心腹積携黨援孤絕農畝荒廢糧廩內空城隍社稷勢黨殄潰弔民問罪今實其時可令陝東道行臺上柱國秦王

世民總統諸軍東踰崑崙分命驍勇百道俱進救彼塗  
炭誅其克渠凡此授律義在拯民府庫資財一無所利  
尅敵制勝効策獻功官賞之差竝超常典其有背賊歸  
款因事立勲即加寵授務隆優厚

四年二月戊申遣左武侯大將軍竇抗率精騎三千赴

東都

三月世充降

六月遣趙郡王孝恭率巴蜀兵沿流下廬江王瑗自襄  
陽道黔州刺史田世康自辰州道黃州總管周法明白

夏口道以圖蕭詵

十月  
尅之

七月竇建德餘黨劉黑闥范願王小胡以漳南舉兵反  
棗彊人以城叛歸黑闥詔發關中步騎三千令將軍秦  
武通定州總管李玄通擊之又遣幽州總管燕郡王李  
藝率兵南會

十二月劉黑闥陷冀州遣左屯衛大將軍義安王孝常  
率兵擊之

五年六月劉黑闥引突厥之衆寇山東遣燕郡王藝擊



之又遣淮安王神通討徐圓朗七月貝州州曹該董康  
買舉兵反以應黑闥以淮陽王道玄為河北道行軍總  
管以討之

十一月遣齊王元吉擊黑闥於山東

六年五月平之

六年八月淮南道行臺僕射輔公柘據丹陽反僭稱宋  
王遣趙郡王孝恭率兵趨江州

九月輔公柘遣其黨徐紹宗侵海州陳政通侵壽陽詔  
趙郡王孝恭水路趨九江嶺南道大使李靖引交廣泉

桂之衆趨宣城懷州總管黃君漢出譙亳齊州總管李世勣出淮泗以討公柘詔曰禁暴戢兵昔王於是致治亂常干紀有國所以明刑淮南道行臺尚書左僕射上柱國輔公柘本自凡伍素無藝用往因擾亂連結徒旅與吳王杜伏威同心協力保據江淮早率數部遠歸朝化錄其功效授以官爵任官方隅榮寵兼至不能勵身奉上克保名節遂乃包藏禍心圖為不軌自伏威入朝之後公柘恣行專擅違犯朝憲不顧典章徵歛穀帛掠

奪子女肆其殘忍妄行誅殺驅役士民招聚奸盜毒流  
衆庶怨結遐邇國家務存含養未申刑罰每加懲誡冀  
其自改今乃稱兵內侮假相署置驅扇蟻徒敢行鈔竊  
惟彼兇逆速宜勦定命將授律義在安人已令天策上  
將太尉領司徒尚書令陝東道大行臺雍州牧領十二  
衛大將軍上柱國秦王世民為江州道行軍元帥統率  
驍勇風驅電擊手麾旆所臨當即奔潰凡此罪惡止在魁  
渠脅從之徒一無所問縱有已陷賊黨非其本心拔難

而來因立功效此等之類皆從官賞江淮以南比遭毒  
螫吏民困辱各不聊生平定之後普給優賞即令撫慰  
各令安堵勲賞之科具如別格宜明宣布咸使聞知是  
時又詔徐州總管任瓌為徐州道副元帥濟自楊子津

以討之

七年正月  
公祔卒

七年六月慶州都督楊文幹舉兵反遣右武衛將軍錢  
九隴靈州都督楊師道擊之又遣秦王率兵以討文幹

七月逆徒斬  
文幹來降

太宗貞觀元年五月辛丑開府儀同三司天節軍將軍  
燕郡王李藝於涇州舉兵反遣吏部尚書長孫無忌為  
幽州道行軍總管右武侯大將軍尉遲敬德為涇州道  
行軍總管以擊之師未至左右斬藝傳首京師

十七年三月齊州都督齊王祐殺長史權萬紀典軍韋  
振據齊州自守詔兵部尚書李勣刑部尚書劉德威發

兵討之

兵未至兵曹杜  
行敏執之而降

玄宗天寶十四年十一月范陽節度使安祿山反遣將

何千年劫太原尹楊光翮害之詔以右羽林軍大將軍  
王承業為太原尹衛尉卿員外置同正員張介然為汴  
州刺史河南採訪節度使金吾將軍程千里為潞州長  
史拒賊冊榮王琬為元帥以河西節度高仙芝為副元  
帥統諸軍以東征內出錢帛於京師召募十萬眾號曰  
天武健兒旬日而集屯軍灞上旌旗營帳連亘二十里  
昭曜原野

十二月命河西隴右節度西平郡王哥舒翰為兵馬副

元帥統兵八萬鎮潼關

十五載正月祿山陷東都詔朔方節度郭子儀收河朔以朔方節度副使李光弼為雲中太守攝御史大夫充河東節度副大使知節度事委以東討

七月幸蜀至晉安郡下詔曰我唐受命百四十載德澤浸於荒裔聲教被於殊鄰紹三代之統緒綜百王之禮樂我高祖神堯皇帝奄有大寶應天順人我太宗文武聖皇帝戡難造邦光宅天下我高宗天皇大帝修文偃武惠綏四方

我中宗孝和皇帝聿導孝德惟新其命我睿宗大聖貞皇  
帝清明在躬玄化溥暢朕承累聖之洪訓荷祖宗之丕績  
兢兢業業不敢自寧徃歲韋氏作逆宗社將墜是用翼戴  
先後掃盪兇徒宸極歸真寰宇載宴爾來在位垂五十年  
中原幸無師旅戎狄歲來朝貢夙興旰食勤念蒼生庶弘  
至理永致仁壽媿無帝堯之聖德而有寄鯨之不明致令  
賊臣內外為患蔽朕耳目遠朕忠良或竊威弄權或厚斂  
重賦蟻壤一漏成此滔天構逆召戎馳突中夏傾覆我河



雖擾亂我靖函使衣冠奔竄於草莽黎庶狼狽於鋒鏑伊  
朕之涼德不能寧守厥位貽禍海內有負蒼生是用罪已  
責躬寤寐焚灼上媿乎天地下媿乎兆民外媿乎四夷內  
媿乎九族乾乾惕厲思雪大恥夫定禍亂者必仗於羣才  
理國家者先固其根本太子亨忠肅恭懿悅禮敦詩好勇  
多謀加之果斷永王璘盛王琦豐王珙皆孝友謹恪樂善  
好賢雖頃在禁中未習政事察其圖慮可試艱難夫丞相  
之才師傅之任必資賢哲允屬忠貞况四海多虞二京未

復今所慎擇實惟其人太子亨宜充天下兵馬元帥仍都  
統領朔方河東北平盧等節度使與諸路及諸副大使等  
計會南收長安雒陽以御史中丞裴冕兼左庶子隴西郡  
司馬劉秩試守右庶子永王璘宜充山南東路及黔中江  
南西路節度度支採訪使江陵都督如故以少府監竇紹  
為之傅以長沙郡太守李峴為都副大使仍授江陵都督  
府長史兼御史中丞盛王琦宜充廣陵大都督仍領江南  
東路及淮南等道節度採訪等都使以前江陵郡都督府

長史劉彙為之傳以廣陵長史李成式為副大使兼御史  
中丞豐王珙宜充武威郡都督仍領河西隴右安西北庭  
等路節度採訪使以隴西太守鄧景山為之傳應須兵馬  
甲仗器械糧賜等並於當道本節度採訪度支防禦等使  
號王巨等並依前充使其署置官屬及本道郡縣官等並  
各任自揀擇其有文武奇才隱在山藪宜加辟命量事獎  
擢於戲咨爾元子等敬聽朕命謙恭祗敬以見師傅矜莊  
簡肅以蒞衆官慈恤惠愛以養百姓忠恕哀敬以折庶獄色

不可犯以臨軍政犯而必恕以納忠規往欽哉無替朕命各  
頒所管咸令知悉初江嶺之人聞京師陷賊不知輿駕所  
在互相震駭及見是詔遠近相賀思有所効

肅宗至德元年七月即位於靈武十月至彭原郡宰臣  
房琯抗疏請兵一萬人自為帥以收兩京詔許之以兵  
部尚書王思禮為副分為三軍使楊希文將軍自宜壽  
入劉貴哲將中軍自武功入李光進將北軍自奉天入  
二年三月關中節度王思禮奏將士張子卿等四十餘

人割耳為盟請為父子軍為國討賊又特進張元軌悉稱所領武士一千五百人相與盟咸截左耳誓雪國讐齋所截耳至朝堂帝嘉之

七月蜀郡城中節度健兒郭千仞謀逆上皇御玄英樓親自招諭不從詔六軍兵馬使及蜀郡長史李岷等領防禦兵討平之

九月以元帥廣平王俶領朔方安西回紇西域大軍之衆十五萬號二十萬出討叛逆便收兩京以鎮西北庭

行營節度使李嗣業為前軍朔方河西隴右行營節度使郭子儀為中軍關內行營節度使王思禮為後軍遂收長安廣平王留城中號令三日領大兵而東追殘賊兼收河雒

乾元元年九月詔司徒朔方節度使郭子儀淮西襄陽節度使魯景興平軍節度使李真滑濮節度使許叔冀平盧兵馬使董秦北庭行營節度使李嗣業鄭蔡節度使李廣琛率步騎二十萬衆渡河討安慶緒於湘州又

遣司空李光弼關內及潞府節度使王思禮率所部兵  
續赴湘州

二年七月以趙王係為天下兵馬元帥討思明於河陽  
以司空兼侍中薊國公李光弼為副元帥知節度行營  
事

八月襄州將士康楚元張嘉延率眾為亂陷荆襄澧朗  
等州以太子少保崔光遠兼御史大夫持節荆襄招討  
仍充山南東道處置兵馬都使

十月荆襄平

上元元年四月襄州軍亂殺節度使史翹部將張維瑾據州為叛以陝州來瑱為襄州刺史充山南東道襄鄧等十州節度使討平之

上元元年九月詔曰朕聞昆夷作患周王授鉞於方叔大宛不庭漢王委兵於廣利則知昏迷之黨舞干不足以懷柔聖哲之謀伐叛必資於用武事將禁暴蓋非獲已司徒兼中書令朔方鄜坊邠寧等節度使代國公子儀慶鍾五百運符魚水挺文武之宏才蘊韜鈴之遠略



積蒼生之重望有命伐之元勳負鼎和羹已申於啟沃  
登壇制勝實佇於謀猷萬里長城倚賴攸屬今殘祚未  
殄戎事猶殷爰資一舉之功以靖四方之難宜令子儀  
都統諸道兵馬使管崇嗣充副使取邠慶朔方路過往  
收大同橫野清夷便收范陽及河北仍遣射生衙前六  
軍英武長興寧國左右威遠驍騎等左廂一萬人馬軍  
三千人步軍七千人以開府李光進充都知兵馬使特  
進烏崇福充都虞候右廂一萬人馬軍三千人步軍七

千人以開府儀同三司李鼎充都知兵馬使特進王粲充都虞候渭北官健一萬人馬軍三千人步軍八千人以開府韋京杲充使朔方留後蕃漢官健八千人馬軍八百人步軍七千二百人以兼御史中丞任敷渾釋之同充使蕃漢部落一萬人馬軍五千人步軍五千人以兼御史中丞慕容兆與新投降首領奴賴同統押充使鄜坊等州官健一萬人馬軍一千人步軍九千人以攝御史中丞杜冕充使寧州官健一萬人馬軍一千人步

軍九千人以攝御史桑如珪充使涇原防禦官健二千  
人馬軍五百人步軍一千五百人以大將軍閻英奇充  
使蒐乘練卒藉馬賦車合四海以齊心齊九夷而同力  
金鼓作氣鐵騎爭雄歛野噴山隱天動地以服順之師  
旅討從逆之克徒人事天時指期可定今將略高闕出  
雲中驅蚊蚋於幽燕掃攬捨於鞏維削平天下混一車  
書然後獻凱清廟策勳盟府尅寧區夏豈不盛與兵馬  
既衆恐路次難為供應仍備六十程糧十馱遣馬畜草

料所在量事支供不得妄有煩擾百姓仍委子儀即差人先於諸道計會分般次進發仍與回紇兵馬犄角相應逐便討除所關軍務應須處置並委子儀續具狀奏聞雖有詔命竟不行

二年四月梓州刺史段子璋反襲破綿州殺遂州刺史嗣王虢王巨東川節度李真戰敗五月劔南節度崔光遠與李真領衆平之

代宗寶應元年八月台州賊帥袁鼂攻陷台州刺史史

叙脫身而逃因盡陷浙東諸州縣有衆數萬越及浙西

諸州咸理兵以禦詔河南道副元帥李光弼討之

二年四月

袁龜

平

十月詔以天下兵馬元帥雍王适統河東朔方及諸道

行營回紇等兵十餘萬討史朝義會軍於陝州

十一月朝義平

大歷十年四月詔河東鎮冀幽州淄青淮西滑毫汴宋

深潞河陽等道出討魏博田承嗣

八月田承嗣上表請束身歸朝其將盧子期寇磁州詔

李寶臣李正己李忠臣李勉李昭承田神玉朱滔李抱玉

等同赴磁州討伐

十月擒  
子期

十一年七月汴宋州節度留後李靈耀竊所部兵叛北

結魏博田承嗣為同惡命淮西節度使李忠臣滑州永

平軍節度使李勉河陽節度使馬燧三鎮兵同討之

十月  
擒靈

耀

德宗建中四年三月詔曰淮陽軍節度使李希烈頃以

梁崇義叛逆使之再征既集勲庸大加恩禮名極台輔

賞延子孫而乃負德棄身去忠効逆攻劫道路擅固鄧州而又圖陷汴州攘奪尉氏攻圍鄭圃暴犯汝墳已敕神策汴滑河陽東畿汝州淮南山南荆南湖南劍南江西鄂岳等道十五萬衆尅日齊進弔人靖亂罪止元兇有能斬希烈歸降者四品以上以希烈官爵授之五品以下封異姓王實封四百戶諸軍將士斬獲希烈者亦准此例封賞以軍城降者便以其職授之賜其實封賊平後除供當道外百姓給復三年朕德之不明化有不

洽未躋仁壽尚勞用兵中心咎悼無忘鑒寐

四月以永平宣武河陽等軍節度都統李勉為淮西招

討使襄陽賈耽江西嗣曹王臯等為之副

貞元三年四月希烈平

十一月帝在奉天以朔方節度李懷光軍醴泉神策將  
李晟軍東渭橋以討朱泚

興元元年二月以鎮州王武俊兼幽州節度使令討朱  
滔

三月以神策節度使李晟兼京畿渭北鄜坊丹延節度使



以行在都知兵馬使渾瑊為朔方節度使邠寧振武永

平奉天行營副元帥收復京城

五月京師平

八月以河東保寧軍節度使馬燧為奉誠軍晉絳慈隰  
節度行營兵馬副元帥以靈鹽節度使渾瑊為晉絳節  
度使河中同陝虢等州及管內行營兵馬副元帥同討  
李懷光

貞元十五年九月詔曰淮西節度使吳少誠非次擢用  
授以旌旄秩居端揆之榮任總列城之重期申報効奉

我典常而秉心匪純自底不類克狡成性扇誘多端外肆矯誣內懷疑阻毀忠廢信棄德崇奸擅動甲兵屢越封境壽州茶園輒縱凌奪唐州詔使潛搆殺傷干黷國章已在無赦朕以王者之德在乎好生人君之體務於含垢寧屈已以宥罪不殘人以興師是以上稽宗社之盛外抑忠賢之請庶其悛革當議優容今更幸鄰境之喪逞貪亂之志焚掠縣邑殘暴平人朕猶冀其知非為之忍恥亟頒詔令未許出師至乃遣軍攻逼許州肆其

蠱毒恣行殺戮流害黎蒸惡稔禍盈人神同棄興言致  
討實悼予衷宜令宣武軍河陽三城鄭滑等州節度東  
都汝州等軍犄角相應同逼申光蔡州常冀幽州淄青  
魏博易定澤潞太原淮南等州徐泗山南東道鄂岳等  
軍各發士馬逐便犄角齊進同為討伐大軍四合計日  
殲夷嗟我忠良受茲誑誤或心存憤激而力屈克威玉  
石俱焚良增憫惻其所收得少誠管內州縣百姓官吏  
等宜切加慰撫各示安存淮西將士等夙著勲庸素懷

忠義為其脅制深可哀矜若能因事建功捨逆効順朕當復其職位待以官封其吳少誠在身官爵竝宜削奪其有叶心同謀擒斬少誠者先有官未有官者竝授御史中丞大夫封異姓王賜實封五百戶賞錢萬貫庄宅各一所子孫永為功臣先有御史中丞異姓王及刺史者即超轉三資改賜官賞其才器行業為眾所推者便授節度使如有心懷忠憤謀斬少誠被其屠戮者先無官者追贈三品官賜實封二百戶先有官者贈二品官

賜實封三百戶仍各與一子正員五品官已有官者超  
三資與正員官其所在百姓能團結士衆討除梟斬少  
誠者准例封賞人臣之所保者忠天地之所助者順報  
功宥善朕不食言於戲朕司牧黎元為之宗極化有所  
未洽信有所未孚致茲興戎增用媿悼然不暫勞無以  
逸俗不誅暴無以安人咨爾藩鎮方州列辟連帥所宜  
戡剪大憝永康兆人其戮力一心以副朕意應諸道准  
勅赴蔡州許州將士等皆竭忠誠盡心奉國竝懷感激

叶力勤王若能梟斬少誠者亦准前例官賞策勲之典朕所必行如少誠平後應赴行營將士超三資改官其賞物節級當續有處分其將士月糧在後迴給家口宣示中外咸令知悉

十六年二月以諸將與賊戰皆不利而退詔左神策行營銀夏節度使韓全義為蔡州行營招討使陳許節度使上官況副之

十月詔赦  
吳少誠

憲宗元和元年正月戊子制曰劍南兩川疆界素定藩

鎮守備各有區分頃因元臣薨謝鄰境不睦劉闢乃因  
虛構隙以忿報讐言遂勞三軍兼害百姓朕志存含垢務  
欲安人遣使宣諭委以旄鉞如間道路擁塞未息干戈  
輕肆攻圍擬圖吞併為君之體義在勝殘命將興師蓋  
非獲已宜令河南西道節度使嚴礪領當道士馬與劍  
南東川節度使李康犄角應接仍令神策行營節度使  
高崇文領馬步五千人為左軍左右神策京西行營兵  
馬使李元奕領馬步二千人為次軍竝相續繼發仍仰

高崇文等各差人先與嚴礪計會齊進朕以三蜀之人  
本無過犯征鎮將士各著勲勞迫於威制不能自拔各  
宜分明曉諭令悉朕懷如劉闢稟奉朝經抽兵却歸本  
鎮朕務存誠信必當委待如初其効順之誠臨鎮歸款  
高位重賞當不食言如尚執迷自貽覆滅法既無赦令  
在必行宜一乃心恭守所職其置頓糧料等仍委度支  
使差官勾當無令闕失甲午高崇文領兵馬取鳳翔斜  
谷路李元奕領兵取駱谷路同赴梓州應接

秦惠王時  
用司馬錯



之策以伐蜀漢光武使吳漢伐公孫述魏司馬文王使  
鄧艾伐劉禪晉穆帝使桓溫伐李仁宋武帝使朱齡  
石伐譙縱梁武帝使鄧元起伐劉季連周太祖使尉遲  
迥平蕭紀隋文帝使梁睿平王謙憲宗命高崇文平劉  
闢自秦至元和九度伐蜀四為水軍沂江而上唯光泰  
與鄧艾尉遲迥梁睿及崇文五在斜谷駱谷出師南討  
不庭 九月擒劉闢以獻

三月詔發河東天德兵誅夏州楊惠琳初韓全義入朝  
令其甥楊惠琳知留後俄有詔除李演為節度代全義  
演赴任惠琳據城叛至是討之 是月平

二年十月浙西節度使李錡據潤州反殺判官王澹大

將趙琦又領蘇常湖杭睦五州戍將殺刺史修石頭故  
城欲謀僭逆十月詔曰朕聞好生者天地之仁不在乎  
肅殺止戈者帝王之武不尚乎誅鉏恭惟至言可謂明  
誠朕祇荷前訓纘承丕圖每思道以自弘豈佳兵而為  
念雖朔陸阻命有戡亂之征蜀部興妖獻夷凶之捷而  
所傷皆及於百姓所費寧止於千金靜言思之徃徃興  
嘆非不得已豈復用師李錡屬列宗支任居方伯窮赫  
奕之貴飽綢繆之恩待以親賢報之以禮節授以師旅

用之以亂常肖圓首方足之形無五常百行之性頃者  
累陳章䟽勤請來朝姦態不形偽言甚懇朕頗謂誠志  
久方允從乃降詔書俾修覲禮示以後命委其深心而  
梟首驟呼虺毒橫厲初則詐疾後仍縱兵寮屬以獻規  
受屠使臣以傳命見脅朕務於含垢未忍明言累降中  
人令遵前旨無輅車之戒路有沴氣之滔天加以日逞  
淫征寃痛者無告日興暴賦杼軸者皆空赤子咸罄於  
餓糧白刃屢膏於頸血為人父母聞甚惻然顧惟紀綱

豈敢廢墜其討伐之師竝已有處分剋期齊進其李錡  
在身官爵階勲等竝宜削除仍令宗正寺削一房屬籍  
其兩都及諸州府應有李錡住宅錢物等竝委所繇官  
簿錄聞奏浙西將士素非同惡朕所深知迫於克威不  
能自達但王師進討因事立功梟斬渠魁以效誠節必  
當特加爵秩超異等倫其將吏等以所領歸降者超三  
資官以一身降者亦超資改轉官健歸順者厚加賞給  
仍與叙錄明諭將士罪止一夫其餘染汙一切不問於

是詔淮南節度使王鏐充諸道行營兵馬招討處置使  
仍以內官右監門衛大將軍薛尚衍充都監招討宣慰  
等使徵宣武義寧武昌之師各二千并淮南宣歙之師  
竝取宿州路進討江西兵士三千取信州路進討浙東

兵士取杭州路進討

是月  
平錡

四年十月鎮州王承宗拒命制曰天地以大德煦物而  
高秋厲肅殺之威帝皇以至道育人而前王設誅討之  
典於是乎有阪泉之役有丹浦之威情豈佳兵義存禁

暴朕嗣膺寶歷於茲五年以惕厲居於人上以仁恕撫於天下恭惟文祖之訓敢以武功為先昨者吳屬興妖師徒獻捷朕每念陳原野之衆行鈇鉞之刑雖舉彛章頗懷慙德蓋不獲已豈樂於斯王承宗項在苦廬潛窺戎鎮而内外以事君之禮將而必誅分土之宜專則有辟朕念其先祖規嘗有茂勲貸以私恩抑於公議使臣旁午以告諭孽童俯伏以陳誠願獻兩川期無貳事朕亦收其後效用以曲全授節制於舊疆齒勲賢於列位

况德棣本非成德所管昌朝又是承宗懿親俾撫近鄰  
斯誠厚德外雖兩鎮中實一家而承宗象恭懷奸肖貌  
稔禍欺裴武於得位之後縲昌朝於受命之中豺狼之  
心飽之而愈發梟獍之性養之而益生加以表疏之間  
悖慢斯甚神祇所以不祐天地所以不容智士所以奮  
懷義夫所以興憤式遏亂畧期於無刑恭行天誅示於  
有制其諸道諸軍進討已從別制處分王承宗在身官  
爵竝宜削奪其鎮州管內將士官吏等久在戎行未知

朝典或陷於邪說或迫以克威雖有忠誠無由自達但  
能效順即是王人豈止惟新當加寵渥其有能迴戈殄  
寇因事立功時有褒崇不拘資次貴爵厚祿設之而高  
懸實封名藩待之以厚賞其以一州歸順者便與當州  
刺史仍賜實封二百戶如先是刺史以州歸順者超三  
資與官仍賜實封三百戶以一縣歸順者超兩資與官  
賜實封一百戶其長行官健歸順者當以優厚褒賞如  
將校內有翻然改圖梟斬元惡者授以不次之位寵以



殊常之封王承宗如能革心悔過束身入朝待之如初  
一切不問仍准舊官爵別加寵授於戲王者之師蓋除  
於暴亂止戈之武豈願於傷殘而承宗不能負荷舊勳  
祇承新命自貽其咎寧怨於天遽此興戎至於用鉞固  
非素意用嘆於懷百辟萬方宜諒朕志是月以左神策  
護軍中尉左衛上將軍吐突承璀為左右神策河中河  
陽浙西宣歙等道赴鎮州行營兵馬使招討處置等使仍  
與諸軍計會內侍省內寺伯宗惟澄為河南陝西河陽

已來館驛使內侍省內寺伯曹進玉為京畿華州河中  
晉州太原已來館驛使內侍省內常侍劉國為太原易  
定幽州滄州行營兵馬糧料使內侍省內常侍馬朝江  
為東道行營兵馬糧料使

五年正月詔行營諸道進討鎮州又發徐泗滑等州兵

四千人赴行營

七月赦承  
宗罷兵

八年十二月振武兵亂逐出節度使李進賢屠其家又  
殺判官嚴澈河東節度使王鐔奏李進賢奔於靖邊軍

振武監軍使駱朝寬奏亂衆復平且請給將士衣於本  
州兼言營田之不可成帝怒命夏州節度使張煦以夏  
州兵二千代進賢於振武又命王鐸以河東兵二千煦  
於振武仍許以便宜擊斷

十年正月制曰天地之化由肅殺以成歲功帝王之道  
以威武而輔文德朕祗荷鴻業撫臨庶邦務先弘含每  
慎征伐俾懷仁者有恥且格畏罪者見善即遷而或昏  
迷不恭告命不及固興悖亂之孽自速原野之誅除害

正刑國有彝典吳元濟逆絕人理反易天常不居父喪擅領軍事諭以詔旨曾無敬恭熒惑一方之人迫脅三軍之眾以其父少陽常經任使為之軫悼命申奠祭臨遣使臣凌虐封疆遂致稽阻絕朝廷之禮怠忘父子之恩情旋又掩襲舞陽傷殘士卒焚燒葉縣騷擾閭閻恣行寇攘無所畏忌朕嘗念賞延之義重傷藩帥之門尚欲納於忠順之途處以顯榮之列未能飭法猶為包荒稱以詔書俾申招撫而蠱毒滋長姦心靡悛壽春西南

又陷鎮柵窮克稔惡縱暴挺災覆載之所不容人神之所共棄良非獲已致此興戎蓋亦方伯連帥同請討除伐罪弔人故茲申命宜令宣武忠武太原武寧淮南宣歙等兵馬合勢山南東道及魏博荆南江西歙南東川等道兵馬與鄂南計會東都防禦使與懷汝節度及劔南義成軍兵馬掎角相應同為進討吳元濟舊有官秩宜竝削除大軍既臨計即戮殄嗟我淮右之衆本為勤王之師雖是脅從頻已昭洗念此勲力未嘗弭忘適罹

狡童又此註誤必懷忠順迫在克威苟能率誠即日收效其淮西將士有能梟斬克渠者先是六品已下官授三品正員官其先授五品已上官者節級昇進仍與實封五百戶庄宅各一區錢二萬貫如能率所管兵馬以城鎮來降者竝超三資與改官仍與實封二百戶錢一萬貫以一身降者亦與改轉仍賜錢帛諸道應赴副行營將士如有斬元濟者亦准此處分吳元濟如能束身歸朝竝與洗雪若不能改過罪止其身其餘汙脅一切

不問接賊界州縣百姓軍興已來供饋繁併言念疲瘵  
良增憫然元和九年兩稅斛斗錢物等在百姓腹內者  
并十年夏稅並宜放免其有城鎮將士百姓守節拒賊  
身死王事者各委長吏優給其家仍具事跡聞奏當加  
褒贈并賜錢帛仍與一子官三州百姓莫非吾人諸軍  
所至不得妄加殺戮焚燒廬舍據奪財產并有拘執以  
為俘馘事平之後給復二年三州內有自置義營堡柵  
王師所至能相率來降各加酬獎時當春候務切農桑

應緣軍務所須並不得干擾百姓如要車牛夫役及工匠之類竝宜和雇情願仍給優價賊平之後應立功將士竝與超資改官節級賜物於戲朕率理道靡敢荒寧思致中和以康億兆而德之寡薄化未昭宣爰用甲兵良深媿嘆顧非重武其在止戈宣示中外咸令知悉自九年秋元濟以其父衆逆命帝初推恩信以待之乃易置四面將帥命嚴師飾壘以臨之望其畏寤聽命賊乃分銳四出焚掠城邑至有犯東畿者繇是帝震怒始下



詔討之

二月以劔南西川之師五百人隸嚴綬徐州之師二千五百人從李光顏又以宣武之師三千人會光顏皆討蔡州又命神策軍郃陽鎮遏將索日進以涇原兵六百人會光顏劔南東川以兵二千五百人會鄂岳團練使柳公綽討賊次於安州

十二月詔發振武兵二千會義武軍以討王承宗

十一年正月制曰上帝垂象輝弧矢之芒先王取威陳

鈇鉞之柄蓋所以昭宣七德保乂兆人故窮陰有助於歲功而大刑無廢於國典朕承累聖之休祉奉昊穹之眷命道思格物心豈佳兵期致俗於和同庶納人於軌度緬窺鐘鼎無忘衛國之勞永惟帶礪每存延代之賞故太尉武俊頃因多難首建大勲懸捧日之明誠遏滔天之逆豎武烈有過於雷震壯容具紀於丹青餘風凜然雖死不朽是宜子孫襲寵邦國同休而王承宗墜乃箕裘隳其門戶不思祖考之德忍與梟獍同謀不顧天

地之恩敢以豺狼為性飽則逾悖撫之不馴克狂屢見  
於表章戕賊竊加於宰輔四方同駭千古所無朕以思  
人愛樹投鼠忌器優柔而不斷隱忍而未征屈其憲法  
惟絕朝貢俾之恩過將謂草心而乃先動干戈屢犯城  
邑焚燒剽掠流毒於人罪惡既不可容誅討蓋非獲已  
况四面征鎮憤激咸同中朝卿士奏議相繼雖覆以大  
道欲更含弘而迫於海魏博昭義等節度兵馬計會進  
討其承宗在身官爵竝從削奪言念迺祖嘗著功庸蠢

茲孩童自取廢絕其所襲實封宜迴賜武俊子右金吾  
衛將軍士平俾之纂承無乏祭祀若承宗翻然改悟束  
身入朝必議加恩不惟貸法如沉迷自若討伐遂行則  
罪止一身其餘驅脅之徒一切不問大軍既臨計即戡  
殄其成德將士等或染惡俗或迫克威雖忠誠無階自  
達但能去逆效順因事立功隨其高下厚加寵錫如有  
梟斬渠魁及執送京兆以效誠節者王承宗在身官爵  
土地等便以迴授仍與實封五百戶庄宅各一區錢二

萬貫如有能率所管兵馬及以城鎮來降者竝超三資  
與官仍實封二百戶錢一萬貫其以州降者便與刺史  
仍賜實封三百戶如本是刺史更超三資與官賜實封  
三百戶以縣降者超兩資與官賜實封一百戶其以一  
營一柵降者節級褒昇務從優厚其諸軍行營將士有  
先登陷陣屠城下邑者亦准此處分諸應行營將士如  
有能梟斬承宗者亦准前例處分其接近賊界州縣自  
軍興已來供饋繁併嗟我疲瘵良增憫然應元和十年

兩稅斛斗錢物在百姓腹內并十一年夏稅並宜放免  
其有城鎮將士百姓守節拒賊身死王事各委長吏優  
給其家仍具事跡聞奏當加褒贈其有潛謀誅斬承宗  
被其屠戮者優加追贈并賜錢帛仍與一子官六州百  
姓莫匪吾人墜于塗炭深用嗟惻兵之所至不得妄加  
殺戮及焚燒廬舍掠奪資產并有拘執以為俘馘事平  
之後給復三年其六州管內百姓能相率來歸者所在  
安存各加優獎方當春候務切農桑邊界之人慮妨耕

織應緣軍務所須竝不得干擾百姓如要車牛夫役工匠之類宜和雇優給價錢賊平之後應立功將士竝與超資改轉節級賜物績有處分於戲朕正位凝命端誠嚮方勞謙在心慈儉為寶而化未陶於頑傲澤未浸於隱微薦興甲兵師在原野中宵愧歎當宁憂兢庶將除姦非曰尚武宣示中外宜體至懷自前年詔絕其朝貢承宗數以兵出境四犯田弘正不勝其忿累疏請誅帝方許以兵加境上未令進討承宗幸其詔旨乃大肆侵

掠幽州及滄州易定之師皆苦之請連兵誅伐乃有是命於是六鎮合勢兵十萬餘環數千里將分承宗之力然諸軍回遠難為主約繇是兵加二年竟不能分其勢

十二年四月罷河北行營專討淮西

二年詔以陳州所送東都防禦五百人廻付汝州又詔發河東兵五千以赴易定

十月命常侍梁守謙監淮西行營諸軍仍以空名告身五百道及金帛付之



十二年正月詔發河東兵一千會於義武軍移賴沈立  
武兵二千會於壽州

七月以中書侍郎平章事裴度為門下侍郎平章事充  
彰義軍節度使仍充淮西宣慰使以刑部侍郎馬總為

副以征元濟

十月淮  
西平

十三年七月詔削奪淄青節度使李師道在身官爵仍  
令宣武魏博義成武寧橫海等軍分路進討其淄青將  
士如能梟斬克渠者節級超獎仍與實封五百戶庄宅

各一區錢二萬貫

十四年二月  
師道平

冊府元龜卷一百二十二

欽定四庫全書

冊府元龜卷一百二十三 宋 王欽若等 撰

帝王部

征討第三

唐穆宗長慶元年八月冀州刺史吳暉潛為幽州兵所逐瀛州兵亂執觀察使盧士玫其州尋為幽州兵所據以河東節度使裴度兼充鎮州四面行營都招討使以左領軍衛大將軍杜叔良為深冀諸州行營節度使以

深冀等州節度觀察使牛元翼為成德軍節度鎮冀趙等州觀察等使時王庭湊賊殺田弘正竊據王地朝廷以元翼鎮冀舊將素以善戰聞班位勇畧在庭湊之右故前命為深冀節度及是又以成德令付之希鎮州兵士望風稟令不戰而歸也

二年二月  
赦庭湊

二年七月汴州軍亂逐節度使李愿立牙將李芥為留後詔以鄭滑節度使韓充為宣武軍節度使又詔陳許節度使李光顏將兵收汴州

八月斬  
李芥

文宗太和元年十一月以攝橫海軍節度副使李同捷  
新除兗海不受詔結幽鎮謀叛詔削同捷在身官爵以  
保義軍節度使李寰為橫海軍節度使又詔發河東陳  
許徐州淄青四鎮兵各五百人助寰討賊仍賜綾絹二

萬匹充賞設

三年五月  
斬同捷

二年八月詔曰朕初撫天下實在便安故委同捷節旄  
處以華壤顧彼童孳豈宜當之然茂棄君親不合容覆  
忠臣義士咸同忿嫉非朕生事致於興戎鎮州王庭湊

承累朝恩榮據四郡士衆將為率先問罪以圖策勲而  
乃影援逆寇干犯王旅諸道使命繫為繫囚內兵滄州  
抗戰四境交支郡之管籥棄鄰好之姻親無恩於家忘

義於國而猶特遣中使許其轉禍詞旨堅執曾無少悛  
近者又令宰臣遺書許以效順王誥一去寂爾無聞臣欽

若等曰王誥奉使  
滄州史失其官

朕以成德一軍代建勲力聆風拭目

待之實殊豈為庭湊一人致使傷及百姓今迫藩臣懇  
請連章繼來朕猶不能獨斷宣示羣公卿士叅詳可否

以觀衆情義不容誅列狀斯在先朝曾效忠慤寵獎逾  
等驟至三公開其自新以全令節朕之恩義亦不負矣  
其諸道與鎮州鄰接處宜竝絕其進奉嚴加警備其有  
突犯及隨指揮併合宜依詣旨處分諸道須有移軍出  
界竝不得焚燒廬舍橫加殘害歸投者撫之拒命者禦  
之如有忠臣義士以一州或城鎮降者竝依討滄州例  
處分其上都進奏院宜令御史臺京兆府切加守提禁  
其出入待後勅處分如庭湊翻然改悔乞效忠勲上表

陳誠須有聞奏亦委鄰界當時轉與進上不得停留於  
戲朕示帝王至仁以安兆庶以黃老清淨用寧寰宇文  
告屢施而不從兵革在郊而未弭致此費詞良多愧歎  
時王庭湊黨助李同捷恣其奸計累以兵革糧鹽濟實  
滄州又以兵拒朝命鄰境通使竝繫而不遣逆狀顯露  
中外同請誅討故有是命

九月詔曰雷電霜雪上天所以成物明罰勅法聖人垂  
之易象豈春陽不可以獨化將輔理固在於刑威乎則



遇亂禁非法天齊俗諒有為而然也李同捷罪暴寰宇  
告之則悖寵之益凌亂君臣父子之紀綱棄覆育生成  
之恩義則綏討之命蓋不得已而王庭湊作我藩臣久  
膺寵命致爵位於擾叛之際齊恩澤於忘義之倫而首  
扇同捷使自纏繞黨惡之心劇於虎兕負法之醜逾於  
梟獍藩方統帥飛疏牙來朝右公卿懇章繼奏皆期鳴  
鼓問罪奮戈啟行朕道在包荒志存含垢多立曲戶大  
開坦途諭之使致奇功告之將酬重位而傲狠彌甚肆

克不悛恣惡言於報章資盜糧於狡寇屢有降卒備驗  
奸欺潛軍入援德棣縱燎以焚瀛莫河東易定被毒騷  
然若尚為包容則孰分逆順其王庭湊在身官爵竝宜  
削奪應諸道與鎮州接界處各逐便攻討其鎮州將士  
如有梟斬庭湊者六品以下官便授三品正員官先是  
五品已上官者節級超獎仍賜宅一所錢二萬繩如有  
能率所管兵馬以州郡來降超三資與官仍便正授刺  
史賜錢一萬繩以城鎮來降超三資與官仍賜錢五千

繩如庭湊束身歸闕竝與洗雪若執迷安禍罪止其身  
其餘脅汙一切不問

三年三月詔行營兵馬各量揀精銳深壁堅守分兵務  
農非按襲勿更決戰軍中老弱傷疾及揀留固守外竝  
抽歸本里訓勵營生應鄰道節度有鎮兵馬比今權授  
指麾竝宜依前在抽移之限李祐所統兵馬至多既逼  
德州自是本道糧饋不乏進取已深宜依前當處守禦  
六月詔鎮州四面行營兵馬竝宜各歸本界且自休息

其幽州河東易定齊德昭義魏博等俱要保境勿相往來唯庭湊以四郡之地三軍之衆率誠歸闕翻然效順則不獨棄其舊惡兼亦別議新恩唯此一事與達表章

餘勿聽信

八月赦庭湊

武宗會昌三年九月制曰定天下者致風俗於大同安生人者齊法度於畫一雖晉之樂趙家有舊勳漢之韓黥身為佐命至於干亂紀律罔不梟夷禁暴除殘古今大義故昭義節度使劉悟頃居海島嘗列瓜牙屬師道

阻兵王師問罪三面開網一境離心乘此危機遂能歸  
命憲宗嘉其誠款授以南燕穆宗待以腹心委之上黨  
招致死士固護一方迨於末年已虧臣節劉從諫生稟  
戾氣幼習亂風因跋扈之資以專封壤恃紀綱之力以  
襲兵符暫展執圭之儀終無上綬之請隙駒為喻魏豹  
姑務於絕河井蛙自居孫述頗間於恃險誘受亡命妄  
作妖言中罔朝廷潛圖左道接壤戎帥屢奏陰謀顧茗  
卯之所矜豈泉魚之是察暨乎沉痾曾靡哀鳴猶駐將

盡之寃恣行邪僻之志因惑舊校自樹狡童中使授醫  
莫覩其朝服近臣御命不入於壘門逆節甚明人神共  
棄其贈官及先所授官爵并劉稹在身官爵宜當並削  
奪成德軍節度使王元逵魏博節度使何弘敬或姻連  
王室或任重藩維懇陳一至之誠願揚九伐之命吳漢  
任職受詔而初無辯嚴卜式朴忠未戰而義形於內况  
成德軍常以驍騎橫陳首破朱滔戰氣方酣再廻魯陽  
之日鼓音不息三周不注之山魏博軍頃以大旆涉河

竟殲師道建十二郡之旗鼓以列降人削六十年之厲  
階盡歸皇化士傳餘勇軍有雄名必能稟鄴侯之指蹤  
成葛亮之心伐咨爾二帥朕所注懷元逵可本官充北  
面招討澤潞使弘敬充東面招討澤潞使潞府曩者烈  
祖在藩先天啓聖符瑞昭晰繪事煥於泗亭鑿輅巡遊  
金石刻於代邸實謂可封之俗久為仁壽之鄉艱難以  
來頗著誠節必非同惡咸許自新其昭義舊將士及百  
姓等如保初心竝赦而不問如能捨逆效順以州郡兵

衆歸降者必厚加封賞如能擒送劉稹者別授土地以報勲庸頃隨劉悟鄆州舊將校子孫既有義心宜思改悔如能感諭劉稹束身歸朝必當待之如初特與洗雪爾等舊校亦竝酬勞仍委夷行劉沔茂元各進兵同力攻討其諸道進軍竝不得焚燒廬舍發掘墳墓擒執百姓以為俘囚桑麻田苗各許本戶為主罪止元惡務拯生靈於戲藩維大臣抗疏於外髦俊舊老昌言於朝戒朕以祖宗之法不可私一族刑賞之柄所以正萬邦宜



用甲兵陳於原野雖朕以恩不聽而羣臣以義固爭詢  
自僉謀諒非獲已布告中外明體朕懷仍以徐泗節度  
使李彥佐為澤潞西南面招討使河陽節度王茂元以  
本軍屯萬善彥佐制下後踰月未出師朝廷疑其持重  
乃以天德軍使石雄為彥佐之副

四年三月以晉絳副招討石雄為澤潞西面招討使以

汾州刺史李丕為之副

八月劉  
稹平

懿宗咸通九年七月徐州赴桂林戍卒五百人官健許

估趙可立殺其主將王仲甫以糧料判官龐勛為都頭  
剽掠湘潭衡山兩鎮有衆千人擅還本鎮殺節度使崔  
彥曾遂出徐宿官庫錢帛召募兗徒五萬詔徵河南河  
東山南諸道之師討之

十年正月以神武大將軍王晏權充武寧軍節度使兼  
徐州北路招討使右神策大將軍康承訓充徐泗行營  
都招討使又以將軍朱克義王宥李邵史忠用馬澹董  
濤戴可師朱耶赤心王建曹翔馬舉高羅銳秦謨李播

為諸道行營招討使量分諸道之兵七萬三千一十五人以討龐勛

二月詔司農卿薛瓊使淮南廬壽楚等州點集鄉兵以

自固

九月龐勛平

十四年三月雲朔暴亂殺刺史段文楚扶詔太原節度使崔彥昭幽州節度使張公素出師討之

僖宗乾符三年七月草賊王仙芝寇掠河南十五州其衆數萬詔河南藩鎮舉兵討之

四年三月以青州節度使宋威為諸道招討草賊使乃  
給禁兵三千甲馬五百匹

五年四月草賊黃巢黨尚讓大驅河南山南之民其衆  
十萬大掠淮南侍中晉國公王鐸請自督衆討賊詔以  
鐸為荆南節度使諸道兵馬都統

六年八月以東都留守李蔚為河東節度兼代北行營  
招討供軍等使討雲朔李昌國廣明元年四月以前太  
府卿李琢為蔚朔等州諸道行營都招討使應東北面

行營李孝昌李元禮諸葛爽王重榮朱玫等兵馬及忻

代土團竝取琢處分

中和元年二月赦昌國今討黃巢

中和元年正月帝在興元詔太原節度使鄭從讜發本道之師與北面行營招討使諸葛爽代州刺史北面行營馬步都虞候朱玫夏州將李思恭等行營諸軍竝赴

京師討賊

時黃巢據京師

七月帝至西蜀以侍中王鐸為中書令充義成軍節度使兼京城四面行營兵馬都統以太子太師崔安潛為

副忠武軍監軍楊復恭為天下兵馬行營都監以河中

節度使王重榮義武軍節度使王處存鄜延節度使李

孝章朔方軍節度使拓拔思恭分京城四面都統

三年四月

攻京城四年

七月黃巢平

光啟元年三月蔡賊秦宗權據汴鄭以徐州節度使時

溥充蔡州四面行營兵馬都統以武宣軍節度使朱全

忠充蔡州西北面行營都統

文德元年十一月平宗權

二年五月帝在興元邠寧節度使朱玫秦襄王愷為帝

遣將王行瑜率邠寧河南之師五萬屯鳳州十二月密

詔行瑜自鳳州率衆還長安斬朱玫及其黨數百人

以行

瑜為邠寧節度使

昭宗文德元年六月以蜀賊王建大亂劔南陳敬瑄告

難以司空平章事韋昭度充劔南西川節度使兼西川

招撫制置使

明年王建陷成都府自稱留後

大順元年五月以宣武軍節度使朱全忠等上表請與

河北三鎮及汴滑河陽之兵平定太原李克用願朝廷

命重臣一人都總戎事詔中書侍郎平章事張濬為太原四面行營兵馬都統京兆尹孫揆副之率神策軍三千赴行營又以華州韓建成德軍王鎔幽州李康威雲州赫連鐸及朱全忠分為太原四路招討使十一月李克用上表

訴寃遂  
罷兵

二年八月以鳳翔李茂貞表章不遜帝不能容嗣覃王為京師西招討使神策大將軍李鐵副之九月師敗以茂貞為秦王

賜鐵  
券



乾寧二年七月太原節度使李克用舉兵渡河以討王  
行瑜李茂貞韓建等稱兵向關之罪詔以克用為邠寧  
四面行營都招討使夏州李思謙充東北面招討使涇  
原張鏞充西南面招討使是月削奪王行瑜官爵改授  
李克用邠寧四面行營都統十一月  
殺行瑜

後唐莊宗同光三年四月潞州小校楊立據城叛以蕃  
漢馬步軍總管李嗣源陝西留後李紹貞為副率師以  
討之詔令河中馬步兵士五千人騎發赴潞州五月收  
復潞州

九月大舉伐蜀制曰朕以夙荷丕基乍平偽室非不欲  
寵綏四海協和萬邦廣正朔以遐同俾人倫之有序其  
或地居險裔位處驕奢殊乖事大之規但蘊偷安之計  
則必徵諸典訓振以皇威爰興伐罪之師冀遏亂常之  
黨蠢茲蜀主世負唐恩間者父總藩宣任居統制屬朱  
溫東離汴水致昭皇西幸岐陽而乃不務扶持反懷顧  
望盜據山南之土宇全虧閭外之臣誠先皇帝早在并  
門將興霸業彼既曾馳書幣此亦復展謝儀後又特發

使人專持聘禮彼則更不迴一介之使答咫尺之書星  
歲俄移歡盟頓阻朕頃遵崇遺訓嗣統列藩追昔日之  
來誠繼先皇之舊好又專持信幣皆絕酬還緬惟背恩  
食言可忍棄同即異今觀孽豎紹據山河委閣官以持  
權憑阻修而僭號早者曾上秦王緘札張皇蜀地聲塵  
形侮瀆之言辭謗親賢之勲德昨朕風驅銳旅電掃兇  
渠復已墜之宗祧繼中興之歷數捷音旋報復命仍稽  
使來而上抗書題情動而先誇險固加以宋光葆輒陳

狂計別啓奸謀將欲北顧秦州東窺荆渚人而無禮罪  
莫大焉昨容省使李巖奉使銅梁近歸金闕凡於奏對  
備述端繇其宋光嗣相見之時於坐上便有言說先問  
契丹強弱次數秦王是非度此包藏可見情狀加以疎  
遠忠直朋比姦邪內則縱恣輕華競貪寵位外則滋彰  
法令蠹耗生靈既德力以不量在人祇之共憤今命興  
聖宮使魏王繼岌充西川四面行營都統仍命侍中樞  
密使郭崇韜充西川東北面行營都招討制置等使荆

南節度使高季興充西川東南面行營都招討鳳翔節  
度使李曦充都供軍轉運應接等使同州節度使李令  
德充行營招討副使陝府節度使李紹琛充行營蕃漢  
馬步軍都排陣斬斫使兼馬步軍都指揮使西京留守  
張筠充西川管内安撫應接使華州節度使毛璋充行  
營左廂馬步都虞候邠州節度使董璋充行營右廂馬  
步都虞候客省使李巖充西川管内招撫使總領闕下  
諸軍兼西面諸道馬步兵士取九月十八日進發九爾

中外宜體朕懷

十一月  
蜀平

四年二月貝州屯駐兵士擅離本州入鄴推趙在禮為  
兵馬留後帝怒令宋州節度使元行欽率騎三千赴鄴  
都招撫之下詔徵諸道之師進討以武德使王允平為  
內侍省延州馬步軍都指揮使高允鐸為丹州刺史竝  
充鄴都行營招討使是月邢州左右步軍四百人據城  
叛推軍校趙大為留後詔東北面副招討使李紹貞率  
兵討之

三月  
平之

又命蕃漢總管李嗣源統親軍赴鄴討趙

在禮

三月鄴軍  
變立明宗

明宗天成二年二月制曰荆南節度使開府儀同三司  
守太尉尚書令南平王高季興可削奪官爵仍令襄州  
節度使劉訓充南面招討使知荆南行府事許州節度  
使夏魯奇為副招討使統蕃漢馬步四萬人進討以其  
叛故也又命湖南節度使馬殷以湖南全軍會合以東  
川節度使董璋充南面招討使新授岐州刺史西方鄴  
為副招討使共領川軍下峽三面齊進

四月與劉訓等詔曰朕昨以妙選師臣往除兇孽自長  
驅於銳旅將併擊於孤城已發使臣疊頒詔諭料龍韜  
之此舉顧蟻垤以即平今已漸向炎蒸不可持久切在  
訓齊貔虎速進梯衝必期此月之中須殄干天之逆責  
令戰士免至疲勞兼冀生民早諧蘓息惟卿忠烈體朕  
憂勤儻能克副於指呼便見立成其功效固於酬獎予  
無恡焉癸卯有內臣自荆南至云暑雨方甚兵士苦之  
及劉訓有疾乃命樞密使孔循徑往荆南城下

五月破其水寨



迴而

三年四月北面副招討使王晏球以定州節度使王都反狀聞制曰王者君臨八表子育萬民務匿瑕含垢之仁引禁暴戢兵之德每存寬恕貴就和平其有受國深恩承家舊履乖失臣節包藏禍心萌悖亂以欺天恣貪殘而害物苟無征討曷示紀綱義武軍節度觀察等使檢校太尉兼中書令守定州刺史太原郡王王都猥以凡材託於盛族梟獍之克早縱豺狼之性不移位極人

臣跡無忠孝自朕纘承大業懷輯羣方山河之寄愈堅帶礪之盟益甚凡於事體每務優崇骨肉淪落者竝致歸還嗣息薦論者遍加任使一門受寵九族同榮近以家艱疊頌國命行吊遠繫於卿士奪情尋復於公侯繼下絲綸薦及垣翰在予之分於爾何虧而屬者所為頻彰逆狀徵發不從於朝命賦租罔係於省司擅致軍都遍抽編戶專修城壘潛造甲兵說誘佐命藩臣留滯歸朝刺史賴皆忠順尋各奏聞曾令近侍馳書責使深思

改過載惟撫御敢怠含弘近乃長惡靡悛亂常尤甚遣  
姦人招軍前節級出妖言惑管內生靈兼掛牒文已為  
邊患闔境之蒸黎愁沮遠遣告陳鄰藩之主帥封章共  
期戡定其王都宜削奪在身官爵仍令馬步兵士於州  
側近權置行州招誘在州軍人百姓及安撫鄉川人戶  
於戲不祥之器寧願舉於干戈無罪之民豈忍墜於塗  
炭將行吊伐倍軫情懷勉施極赦之功勿致傷夷之弊  
雖軍威須振在王道無虧凡百戎臣當體朕意宣布遐

邇咸使聞知應諸道舊有定州兵士處竝詔安撫勿令  
憂疑又制北面行營權副招討歸德軍節度使王晏球  
可充北面招討使權知定州軍州事北面行營馬軍都  
指揮橫海軍節度使安審通充北面行營副招討兼諸  
道馬軍都指揮使宣殿直翟令竒等十五人起諸道軍  
伐定州以鄭州防禦使張虔釗為北面兵馬都監四年  
平王  
都  
九月詔武寧軍節度使房知溫兼荆南行營招討使知

荆南行府事以尚食使馬從斌守澤州刺史中外命八

道起軍赴襄陽

四年五月高  
從誨歸順

十月詔邠州節度使李從敬攻慶州以刺史竇廷琬拒

命故也

十二月  
平廷琬

長興元年四月皇子河中節度使從珂遣人口奏曰今

月五日閱馬於黃龍莊衙內指揮使楊彥溫據城謀叛

尋時詰問稱奉宣命臣見在虞鄉縣狀候進止帝謂安

重誨曰亂臣賊子何代無之安得有此語重誨曰奸賊

之言也宜速進討即命西京留守索自通侍衛指揮使  
樂彥稠等率兵攻之仍授彥溫絳州刺史冀以誘而擒  
之彥稠辭帝謂之曰與吾生致彥溫吾將面訊之遣左  
右羽林都指揮使張從賓率宿衛兵士指揮赴河中

是月

斬彥  
溫

九月利閻遂三州奏東川節度使董璋結連西川孟知  
祥點聚鄉兵欲來攻逼州城探得發兵次安重誨奏曰  
自今年三月後來山南東川諸州奏報董璋叛逆者數

十陛下以事機未發含垢匿瑕臣必知有此事帝曰朕  
不負他以生靈之故須議興師問罪乃以左驍衛上將  
軍趙在禮為同州節度使兼西南行營馬步軍都指揮  
使又下制曰王者興師討伐若行其時雨農夫去草誅  
鋤務絕其本根具載格言式符戎畧而况天垂弧矢盡  
殪狼星國舉干戈當平賊子得不朝申號令夕議削除  
安邦守正翊贊功臣劔南東川節度使特進檢校太尉  
同中書門下平章事梓州刺史董璋受國深恩斃邦重

寄但恣貪殘之性莫分宵旰之憂唯務包藏顯章侮慢  
朝廷每施含垢具為掩瑕略無悛革之心轉有狂迷之  
狀伺便而侵漁仁境何名而黠發義軍仍於關防輒修  
堡砦兼傳書檄招寇盜於晉州尋縱賊徒欲窺覲於遂  
府焚燒民舍驅虜耕牛覽奏報以實繁數愆尤而莫盡  
豈有武度裕身為刺史輒敢縻留大程官手執宣頭略  
無遵稟而又淫刑害物酷法作威鉄籠之炮炙未開金  
贖之科罪竝發善人知懼惡貫已盈且擢髮以難窮宜



燃臍而不救今則已徵師旅將掃妖氛舉烈火以燎毛  
飛嚴霜而脫葉匪朝伊夕覆狡擒奸於戲無禮於君奮  
鷹鷲而驅烏雀有功必賞誓帶礪而保山河殄寇則理  
在必然興兵則事非獲已凡在遐邇宜體朕懷其董璋  
在身官爵並削奪又詔西川節度使孟知祥兼東川西  
面供饋使天雄軍節度使石敬瑭充東川行營都招討  
使武信軍節度使夏魯奇為之副

十二月遣樞密使安重誨赴西面軍前時帝以蜀路險

阻進兵艱難潼關以西物價絕賤百姓般糧往利州每費一斛不得一斗至今噍類攘攘逃竄山谷或聚為盜慮不堪命帝念饋輓之苦形于顏色謂近臣曰聞勞擾軍前未有成功孰能辦吾事者朕須自行重誨奏曰此臣之責也臣今請行許之言訖面辭翼月發赴軍前邠州節度使李敬周如京師羅延魯供奉官周務謙丁延徽陳審瓊韓玫符彥倫等並從重誨西行

二年正月以權知興元軍府事王思同為山南西道節

度使充西面行營馬步軍都虞候

三年正月以前彰國軍留後孫漢韶為相州節度使充

西面行營副都部署

六月董璋為孟知祥所敗  
知祥遂入梓州因而罷兵

末帝清泰三年五月鄴都屯駐捧聖都虞候張令昭逐

節度使劉延皓據城叛以汴州節度使范延光為天雄

軍四面招討使知行府事以西京留守李周為天雄軍

四面副招討使兼兵馬都監

七月收復鄴都

晉高祖天福二年六月六宅使張言自魏府使迴奏范

延光叛命遣客省使李守真往延光所問罪尋以侍衛使楊光遠充魏州四面都部署以東都巡檢使張從兵為副

七月安州軍亂都指揮使王暉宰節度使周環於理所遣右衛上將軍李金全領千騎赴安州

八月王暉為部下所殺九月以

李金全為節度

十一月賜魏州都部署楊光遠空名官告自司空至常侍凡四十道將士立功者得補之而後奏

三年九月延光降

五年五月安州節度使李金全叛詔新節度使馬全節以維汴汝鄭鄆宋陳蔡曹濮十州之兵討之以前鄜州節度使安審暉為副以內客省使李守貞為都監仍遣供奉官劉彥瑤馳詔以諭金全彥瑤既至金全麾下齊謙以詔送於淮南雲夢人齊峴斬謙歸其詔於門六月收復

州安

六年十一月襄州節度使安從進一軍叛以西京留守高行周為南面軍前都部署前同州節度使宋彥筠為

副宣徽南院使張從恩監馬以護聖左第四軍指揮使  
安懷浦為行營馬軍都指揮以奉國右第四軍都指揮  
使杜希遠為行營步軍都指揮使以護聖左第四軍都  
指揮使郭金海為先鋒使東京內作坊使陳恩讓監護

馬

七年八月平之

十二月三州節度使安重榮稱兵向鄴都乃遣聖奉國宗  
順興國威順等馬步軍三十九指揮擊之鄴州節度使  
杜重威為招討使邢州節度使馬全節為副兼排陣使前

貝州節度使王周為馬步軍都虞候雒州團練使王令

溫為馬軍都指揮使奉國左第三軍都指揮使程福贊

步軍都指揮使護聖右第六軍都指揮使史文釗為先

鋒都指揮使鄴都作坊使翟令竒為先鋒都監

七年正月斬安

重榮復

鎮州

少帝開運元年五月遣侍衛親軍都虞候李守貞率步

騎二萬討楊光遠於青州以守貞為青州行營都部署

以河陽節度使符彥卿副之

閏十二月平之

漢高祖即位稱天福十二年是年閏七月新授宋州節度使杜重威據鄴都叛詔削奪重威官爵貶為庶人以

高行周為行營都部署率兵進討

十一月重威降

隱帝乾祐元年三月河中節度使李守貞謀叛以陝州節度使白文珂為河府城下一行都部署四月以檀州節度使郭從義永興軍一行兵馬都部署時供奉官時知化王益自鳳翔部署前永興軍節度使趙贊部下牙兵趙思綰等三百餘人赴闕三月二十四日行次永興



思綰等作亂突入府城據城以叛故命從義以討之又  
以侍衛步軍都指揮使尚洪充行營都虞候以客省  
使王峻為兵馬都監

七月鳳翔節度使王景崇拒命不受代詔新除鳳翔節  
度使趙暉充鳳翔行營都部署以討之

八月命樞密使同中書門下平章事郭威赴河中軍前  
詔河府永興鳳翔行營諸軍一稟威節制

二年七月恩  
綰守貞平三

年正月王

景崇平

周太祖廣順元年正月湘陰公劉贇丁元從右都押衙  
鞏廷美教練使楊溫等據徐州以拒命帝遣新授武寧  
軍節度使王彥超率兵赴之廷美等遷延不肯開門遂  
詔進攻仍曉諭城內軍民曰昨以鞏廷美楊溫等不認  
朝旨妄蓄疑心累令招攜明示誠信雖有章奏尚未開  
門既無果決之心必是疑君之計今以指揮王彥超排  
此大軍攻討汝等若能誅斬元惡應接官軍上城者若  
是將校員僚只與超拜官資兼授刺史百姓即給厚賞

穩便安排但收此絹書以為憑信

三月收復徐州

十月以并寇劉崇犯邊攻圍未解遣樞密使平章事王峻將兵援之

三年正月以兗州慕容彥超反狀已具無以招懷乃命侍衛步軍指揮使曹英為都部署起兵討之仍以齊州防禦使史延超為副皇城使向訓為都監陳州藥元福為行營馬步都虞候龍捷右廂都指揮使王全斌為行營馬都指揮使控鶴都指揮使郭超為行營步軍都

指揮使前貝州節度副使梁晉超為行營馬軍都監前  
棣州刺史李萼坊州刺史靳霸懷州刺史李萬超並佐

營軍

五年帝赴兗州軍前慰勞是月破之事具帝王親征門

世宗顯德二年七月以鳳翔節度使王景崇兼西南行  
營都招討使宣徽南院使鎮安軍節度使向訓兼西南  
面行營兵馬都監收秦鳳二州先是晉末契丹犯闕秦  
州節度使何建以成秦階三州入蜀蜀人又取鳳州至  
是秦鳳人戶怨蜀之苛政相次詣闕乞舉王師收復舊

地乃有是命

時宰臣上言請且罷西師言甚切直帝曰秦鳳二州頃因賊臣叛入西蜀後屬中朝

多事未暇恢復量其土疆且非遐僻咫尺之地聲教未被朕實有所慙今若無功退軍亦大國取弱之道舉偏師即期收復卿等所言甚嘉然無至多慮也是年九月秦州降十一月收復鳳階成三州

十一月帝謂侍臣曰淮南獨據一方多歷年所外則結連北境與我為讐言稔惡既深朕不敢赦今將命將討除與卿等籌之乃以宰臣李穀為淮南道前軍行營都部署兼知盧壽等州行府事以許州節度使王彥超副焉又命侍衛馬軍都指揮使韓令坤已下一十二將各帶

征行之號以從焉是月勅淮南管内州縣軍鎮官吏軍人百姓等朕自纘承基構統御寰瀛方當恭己臨朝誕修文德豈欲興兵動衆專耀武功顧茲昏亂之邦須舉弔伐之義蠢爾淮甸敢拒大邦因唐室之凌遲接廣寇之喪亂飛揚跋扈垂六十年盜據一方僭稱偽號倖數朝之多事與北虜而交通厚啟戎心誘為邊患晉漢之代寰海未寧而乃招納叛亡朋助凶慝李金全之據安陸李守貞之叛河中大起師徒來為應援攻侵高密殺

掠吏民迫奪閩越之封疆塗炭湘潭之士庶以至我朝  
啟運東魯不庭發兵而應接慕容觀釁而憑凌徐部沐  
陽之役曲直可知尚示包荒猶稽問罪邇後維揚一境  
連歲阻饑我國家念被災荒大計糴易前後擒獲將士  
皆遣放還自來禁戢邊兵不令侵撓我無所負彼實多  
奸勾誘契丹至今未已結連兵寇與我為讐罪惡難名  
人神共憤今則推輪命將鳴鼓出師徵浙右之樓船下  
朗陵之戈甲東西合勢水陸齊攻吳孫皓之計窮自當

歸命陳叔寶之數盡何處偷生應淮南將士軍人百姓  
等久隔朝廷莫聞聲教雖從偽俗應樂華風必須善擇  
安危早圖去就如能投戈獻款舉郡來降具牛酒以犒  
師奉圭符而請命車服玉帛豈怯旌酬土地山河誠無  
愛惜刑賞之令信若丹青苟或執迷寧免後悔王師所  
至軍政甚明不犯秋毫有同時雨百姓父老各務安居  
剽虜焚燒必令禁止自茲兩地永為一家凡爾蒸黎當

體誠意

五年三月淮南平  
事具帝王親征門





冊府元龜卷一百二十三